

առաջնորդական գահի տէրը խաչատուր Իլովացին էր 1492–1502 թուականներին⁵⁴։ Վերջինս նախկինում, 1461 թուականից մինչև Ստեփանոս Ա-ի ընտրութիւնը 1485 թուականին (կամ գուցէ մի քիչ առաջ), արդէն Լուսովի աթոռի տէրն էր եղել⁵⁵։ Իսկ այժմ նրա վերաբաղմուն այդ աթոռի վրայ՝ մենք դիտում ենք Հռոմում լատինադաւանութիւն եւ պապի հպատակութիւնն ընդունած Ստեփանոսի դէմ որպէս բողոքի եւ ընդվզման ապացոյց կամ շարժում՝ էջմիածնի աթոռին հաւատարիմ Լուսովայեցի եւ նրանց երեւելիների կողմից, եւ ոչ թէ որպէս հետեւանք այն բանի, որ Ստեփանոսը մահացած պէտք է լինէր 1492 թուականին, ինչպէս կարծում է Պետրովիչը⁵⁶։ Ստեփանոսը շարունակում էր Լուսովում ապրել անտեսուած եւ արհամարհուած վիճակում, առաջնորդական իրաւունքներից հեռու։ Խաչատրի մահից յետոյ, 1502–1515 թուականներին, աթոռը թափուր էր մնացել մինչև Գալստի ընտրութիւնը⁵⁷։ Իսկ այս տասնչորս տարուայ թափութեան շրջանում, երբ սապարէզում մի յարմար եւ արժանաւոր մարդ չէր հանդէս եկել առաջնորդական աթոռի համար, մեկուսացուած երբեմնի թեմակալ Ստեփանոսն, ամենայն հաւանականութեամբ, փորձ էր կատարել իր կորցրած աթոռը վերագրուելու՝ իր կողմնակիցների եւ տեղական լատին հոգեւորականութեան օժանդակութեամբ Հռոմից ստանալով իր հաստատումը։ Եւ այս հանգամանքներում՝ Ստեփանոս Ա-ը, իր հպատակութիւնը վերահաստատելու նպատակով, պէտք է կրկին անգամ Հռոմ այցելած լինի այդ շրջանում, խաչատուր Իլովացու մահից (1502 թ.) հաւանաբար քիչ յետոյ, երբ այնտեղ իննովկենտիոս Ը-ի յաջորդներից Յուլիոս Բ-ն էր գտնուում քահանայապետական գահի վրայ (1503–1513 թթ.)։ Եւ անա այդ է, որ, մեր կարծիքով, արտայայտուած է Լուսովի դամբանային արձանագրութեան մէջ, թէ «նազանդութիւն յայտնեց գերագոյն քահանայապետ Յուլիոս Բ-ին» (Iulio Secundo Pontifici Maximo reddidit obedientiam)։

Կարծում ենք, որ սրանում է գաղտնիքը Լուսովի արձանագրութեան մէջ Սեփանոս եւ Յուլիոս Բ անուանների զուգորդման։

Բնականաբար Ստեփանոսի համար Յուլիոս Բ-ից ճանաչում ստանալը որեւէ գործնական արգիւնք չէր կարող ունենալ նրա հետապնդած նպատակի առումով, որովհետեւ լեհական պետութեան մէջ ազգային-կրօնական համայնքների կառավարման համար գոյութիւն ունէր իրաւական սահմանուած կարգ, որի համաձայն այդ համայնքներն իրենք էին ընտրում իրենց առաջնորդներին եւ Լեհաստանի թագաւորները պարզապէս վաւերացում էին տալիս նրանց⁵⁸։ Եւ այդ իրաւունքի հիման վրայ էլ Լուսովի «հերձուածող» հայութիւնը, իր «հերձուածող» երեւելիների ղեկավարութեամբ, նախընտրեց մնալ առանց առաջնորդի՝ մինչև 1515/16 թուականները, քան առաջնորդական աթոռը կրկին յանձնել լատինադաւան Ստեփանոսին։

Թէ՛ երբ է մահացել Ստեփանոս Ա-ը, այդ մասին ոչ մի տեղեկութիւն չկայ հայկական եւ լեհական աղբիւրներում։ Հաւանաբար չափազանցութեան մէջ ընկած չենք լինի, եթէ ընդունենք, որ նա մօտ 90 տարեկան հասակում մահացած լինի 1551 թուականի յունուարին։ Իսկ դա լիովին հնարաւոր է։ Ինչպէս տեսանք՝ Ստեփանոսը Լուսովի աթոռի վրայ էր 1485 թուականին (հաւանաբար նոր էր ընտրուել)։ Իսկ եթէ այդ ժամանակ եղած լինէր մօտ 25 տարեկան, ապա 1551 թուականի յունուարին կը լինէր 90 տարեկան։ Ենթադրենք՝ լինէր նոյնիսկ 95 տարեկան։ Եւ ամենեւին տեղի չկայ կասկածելու, որ մեզ ծանօթ դամբանային արձանագրութեան մէջ

54 PChA p. 67 – 74 e 77.

55 Տե՛ս եւ հմտ. Ստ. Ռոշքա, էջ 158–161։

56 PChA p. 77.

57 Ibidem, p. 78–84.

58 Լեհահայերի ինքնավարութեան իրաւունքի մասին նիւթեր չառ կան։ Վերջին եւ լատինադաւան ուսումնասիրութիւններից մէկն է՝ G. Petrowicz, «L'organisation juridique des Arméniens sous les monarques polonais», *Revue des Études Arméniennes*, Paris, nouv. série, t. IV, 1967, p. 321–354.